



# KREANDO PROSPERIDAT DOR DI KONEKTÁ OPORTUNIDATNAN DI INVERSHON KU INVERSHONISTANAN

---

## SKINA DI INVERSHONISTA

---

Publikashon 8. 2017

### Entrenamentu pa invershonista prinsipiante

#### Parti 1

*“Tur bende tin e poder serebral pa sigui e bolsa di balor. Si bo a kompletá aritmétika na nivel di skol básiko, bo por hasi’e”*

***Peter Lynch***

Hasi negoshi riba un bolsa di balor ta hopi mas fásil ku lo bo kere. Podisé den pasado e tabata difísil òf solamente pa esnan riku pero ku e yegada di Internet i e aparishon di numeroso aplikashonnan ku ta konektá e bolsanan rònt mundu, e bolsanan di balor ta mes alkansabel ku registrá un kuenta di twitter. Pues si e ta tan fásil, di kon no hasi’è. Por ta un poko spantoso pa profundisá den e deskonosí. Mi sa. Pues ata e promé dos tepnan ku mi tin gana di kompartí ku bo, komo prinsipiante den hasi negoshi riba un bolsa!

#### ***1. Buska e partner korekto:***

Kon lo bo sa kua akshon pa kumpra, kuantu pa kumpra, òf mihó ainda, for di kua paisnan òf regionnan pa kumpra e akshon? Bo mester kumpra akshonnan mes òf lo bo mester kumpra bono en bes di esei? Òf al kontrario, lo bo mester ta hasiendo invershonnan mas eksótiko ku ganashi potensialmente mas altu? E solushon? Buska un konsehero di invershon. E konsehero di invershon lo asistí bo dor di evaluá bo situashon personal – bo salario, bo balor neto, e motibu prinsipal di kon bo ta hasi invershon, e periodo riba kua bo ta hasi invershon, bo nivel di komodidat ku pèrdida – i lo yuda determiná e tipo di invershon ku lo bo mester hasi i e nivel di riesgo ku bo por permití bo mes di tuma, basá riba bo budget i obligashonnan mensual. E parti aki ta hopi importante pa bo komo

prinsipiante pasobra lo bo tin mester di hopi guia den bo proseso di tumamentu di desishon, prinsipalmente den kuminsamentu.

## ***2. Habri un kuenta serka un broker:***

Aunke ku hasimentu di negoshi riba e bolsa di balor a bira hopi fásil, lástimamente no ta posibel pa djis bai na DCSX i kumpra un akshon direktamente serka nan. Bo mester hasi esaki via un broker. E broker ta kapas di kumpra i bende un akshon pa bo riba e DCSX. Ningun invershonista tin aksesu direkto na e bolsa di balor pa kumpra i bende un akshon òf un bono. Pues, pa bo kuminsá, ta importante pa bo habri e kuenta ku un broker. Un kuenta serka un broker ta diferente for di un kuenta di spar, dor ku un kuenta di spar normalmente ta serka un banko komersial. Kaminda un kuenta di broker ta serka un broker òf un intermediario ku ta ofresé un kuenta pa bo kumpra i bende akshonnan. Tin un otro distinsion ku mi ke mustra riba, un broker ta diferente for di un konsehero di invershon.

Tin biaha ku un broker lo por duna konseho di invershon komo un servisio adishonal, meskos ku den Tep #1. Pero, no tur broker por ofresé esaki pasobra e funshonnan di un broker ta signifkamentamente diferente for di e funshonnan di un konsehero di invershon, tene na kuenta ku nan **NO** ta meskos. Esaki ta pasobra, e broker ta wòrdu guiá pa un standart adekuaado, loke ta nifiká ku e broker mester hasi rekomendashonnan na bo ku ta apropiá, basá riba bo sirkunstansianan personal, pero no tin ningun garantia ku un rekomendashon asina mester ta ful den bo mihó interes. Pero, e responsabilidat di un konsehero di invershon ta bai un paso mas aleu, pasobra nan tin un responsabilidat fidusiaro na bo. Loke esaki ke men, ta ku e rekomendashonnan di un konsehero di invershon mester ta tantu apropiá pa bo, komo den bo mihó interes. Ku otro palabra, un konsehero di invershon mester pone bo interes komo kliente, riba su propio interes. Pues si bo registrá ku un broker ku ta ofresé servisio di konsehero komo un funshon separá, esaki lo ta un mihó areglo pa abo komo prinsipiante pasobra e broker e ora ey mester soru tambe ku su konseho ta ful den bo mihó interes. Si no, e ora ei bo mester buska un konsehero di invershon pa ampliá e servisio ku bo ta haña di un broker pará riba su mes, pa asina bo interes semper ta wòrdu mihó sirbí.

No tur broker òf konsehero di invershon ta meskos. Manera kualke relashon, ta rekomendá pa skohe bo partner bon.

Den e próksimo publikashonnan nos lo eksplorá e kalidatnan ku lo bo mester buska ora bo ta disidí riba un konsehero di invershon òf un broker – esei lo ta den Parti 2. Den Parti 3, nos lo kompartí e tepnan restante pa prinsipiantenan den entrenamentu.

Sigui Skina di Invershonista pa tur kos ku bo mester sa tokante Kreashon di Rikesa!

***E editorial aki ta wòrdu presentá na bo pa e DCSX ku kolaborashon di Vertex Investments.***

***Outor di e publikashon aki: Stephanie Shaw CFA, MBA***

